

Bosna i Hercegovina
Federacija Bosne i Hercegovine
Zeničko-dobojski kanton
OPĆINA VAREŠ
OPĆINSKO VIJEĆE



Broj: 01-250/22
Vareš, 30.11.2022. godine

Z A P I S N I K
sa 19. sjednice Općinskog vijeća Vareš,
održane 27.10. 2022. godine

Predsjedavajuća OV pozdravila je sve prisutne.

Izvršena je prozivka vijećnika.

Prisutni vijećnici: Mirnes Ajanović, Sahudina Beganović, Nurdin Begović, Maja Berberović, Mahira Brkić, Amela Brkić, Asmir Čizmo, Dario Dodik, Zdenko Franjić, Nazif Hajrić, Igor Hinger, Šaban Ibrišimović, Emir Islamović, Salih Memić, Mario Mirčić, Nedžad Mušanović, Malik Rizvanović, Nikola Šimić i Edib Zubača.

Odsutni: Nema.

Mahira Brkić – predsjedavajuća Općinskog vijeća Vareš konstatira da Vijeće može raditi jer ima kvorum za rad sjednice.

Predsjedavajuća OV otvorila je 19. sjednicu s početkom u 15.00 sati, u velikoj sali Općine Vareš.

Pored vijećnika sjednici prisustvuju: Općinski načelnik – gosp. Zdravko Marošević, sekretar Općinskog vijeća – gosp. Leon Pavlović, pomoćnici načelnika - gosp. Ermin Musa, gosp. Čedomir Jelić i gosp. Ibrahim Spahić, rukovodilac JURA – gosp. Rusmir Berberović, ispred Službe za privredu, finansije i trezor – gosp. Mirza Fatić i predstavnici medija.

Sekretar OV Leon Pavlović izvijestio je Vijeće da je na 18. sjednici OV održanoj 28.07.2022. godine, Vijeće donijelo pet (5) Zaključaka od kojih su tri (3) realizovana a dva (2) su u toku realizacije. Postavljena su četiri (4) vijećnička pitanja. Na sva pitanja je odgovoreno. Podnosiocima pitanja i svim ostalim vijećnicima dostavljeni su pisani odgovori na vijećnička pitanja. Na 1. Vanrednoj sjednici održanoj 29.08.2022. godine, Vijeće je donijelo jedan zaključak koji je u toku realizacije.

Općinski načelnik Zdravko Marošević u svom obraćanju pod aktuelnim pitanjima informisao je Vijeće o određenim razlozima zbog kojih neki projekti kasne u realizaciji. Zahvalio se UniCredit Bank na suradnji i razumijevanju u realizaciji kreditnih sredstava. U narednom periodu pristupit će se izradi rebalansa i budžeta Općine Vareš za 2023. godinu.

(Izjašnjavanje vijećnika o dobivenom odgovoru)

Nije bilo izjašnjavanja vijećnika.

adresa: Zvijezda 34, 71330 Vareš
identifikacijski broj: 4218285300002
depozitni račun Unicredit banka:
3380002210017420

tel.: 00387 32 848 100;
fax: 00387 32 848 150;
web: www.vares.info
e-mail: vares@bih.net.ba



(Vijećnička pitanja i Inicijative)

Maja Berberović

1. Pitanje upućujem Općinskom načelniku. Da li ima informaciju vezanu za sanaciju mosta na regionalnoj cesti R 444 u naseljenom mjestu Pajtov Han prije skretanja u MZ Striježevo. Most je u lošem stanju, predstavlja problem u bezbjednosti za sve učesnike u saobraćaju.
Ukoliko načelnik ne bude imao informaciju u vezi mosta, molila bih da se insistira u vidu Zaključka OV prema Kantonalnoj direkciji za ceste da se izvrši hitna sanacija.

Amela Brkić

2. Pitanje se odnosi na sanaciju potpornog zida u ulici Glavica br. 8 . Mislim da su sredstva za sanaciju obezbijeđena sa drugih nivoa vlasti, to je ono što su mi građani koji žive u tom dijelu grada rekli, međutim ta sanacija nikada nije izvršena. Kada se može očekivati sanacija pomenutog potpornog zida?
3. Moje pitanje se odnosi na kvalitet vode za piće u MZ Budoželje. Stalna zamućenja vode, koja se zbog toga ne može koristiti i ako se plaća kao pitka voda. Zamolila bih da se napravi plan koji će omogućiti korištenje vode.

Emir Islamović

4. Postavio bih pitanje načelniku Općine Vareš. Kada će doći do realizacije projekta, koji se odnosi na stadion na Budoželju?

Dario Dodik

5. Kada se vratimo unazad na sva postavljane pitanja i podnešene Inicijative, i na sve odgovore koje smo dobili, realizacija ne postoji, navest ću i primjere

- autobusna linija Vareš-Zenica,
- vodovod Pogar-Zaruđe-Strica,
- infrastrukturni projekti u Varešu,
- sanacija mosta na pijaci,
- asfaltiranje dijelova ceste na Zaruđu i Pogari, tada je rečeno i Očevija,
- najavljena asfaltiranja u gradu (Rudarska, ulica prema velikom parkingu, mislim da je bila i ulica Franjići u planu, da li gore Jušići ili Matijevići)
- moja Inicijativa za mali parking.

Imamo još asfaltiranje po selima, asfaltiranje u Vijaci. Čini mi se da to nije bilo planirano i najavljivano, barem kada sam ja pitao nije bilo u planu ali eto to je urađeno kao i ležeći policajci u Dabravinama.

Moje generalno pitanje jeste – „Kada će se krenuti u ispunjenje obećanja?“ Odgovor želim pismeno.

Šaban Ibrišimović

6. Kada će biti raspisan Tender za radove na asfaltiranju planirane dionice puta rc 444a Vareš-Podratanj u projektovanoj dionici Pogar-Luke kroz kanjon rijeke Bukovice. Finansijska sredstva su predviđena Planom utroška sredstava za ove namjene za 2021.

i 2022. godinu i dio su plana i programa modernizacije i uređenja regionalnih cesta na nivou ZDK. Planirani iznos utroška ovih sredstava po navedenom osnovu za ovu cestu je 300.000,00 KM za navedene dvije godine.

7. Kada će se konačno izdati Nalog izvođaču radova na održavanju rc 444a „AME“ d.o.o. Breza za sanaciju i popravku makadamskog dijela rc 444a preko prevoja Kopjari do Bukovice, te sanaciju asfaltirane dionice ove ceste od Pogara do Bukovice, jer na istom postoji potreba dijelova sanacije asfaltne podloge...
Radi napomene navodimo, da je Komisija kantonalne direkcije cesta izlazila na teren prije 50-tak dana i snimila situaciju na putu i predložila mjere aktivnosti na sanaciji ove ceste u zoni makadamskog dijela.
Do sada ništa nije poduzeto od planiranog i predloženog u kontekstu ova dva pitanja od strane nadležne vlade, ministarstva i direkcije za ceste sa nivoa ZDK...

Moja pitanja su upućena prema Vladi ZDK, Ministarstvu za prostorno uređenje promet i komunikacija i zaštita okoline ZDK, Direkciji za ceste ZDK i predsjedavajuća OV Vareš.

Sahudina Beganović

8. Moje pitanje je vezano za srednjovjekovni grad Bobovac. Na mauzoleju je postavljena tabla na kojoj je označena nadmorska visina. Da li znate ko je postavio tu tablu i da li postoji mogućnost izmještanja te table jer u blizini je stijena iste nadmorske visine pa ako postoji mogućnost da se izmjesti sa historijskog spomenka.

Mirnes Ajanović

9. Na osnovu iskazanog nezadovoljstva mještana MZ Budoželje, koji tvrde da je voda iz vodovoda ove MZ neupotrebljiva za piće a plaćaju punu cijenu za usluge i održavanje vodovoda prema JKP, postavljam pitanje - Da li može da se preduzmu aktivnosti od strane JKP-a da se riješi ovaj problem, da li je i koliko do sada urađeno na filterima i sličnim sistemima da se kvaliteta vode u ovom mjesnom vodovodu podigne do nivoa kvalitete da bude upotrebljiva za piće?
Također, da li JKP vrši analizu vode iz ovog vodovoda i šta pokazuju analize?
Te ako je voda iz ovog vodovoda tehničke prirode i ne može da se riješi da postane kvalitetom za piće, treba vidjeti koje su mogućnosti da mještani ove MZ plaćaju manje račune za potrošenu vodu i održavanje vodovoda.

10. Zamolio bih načelnika ako ima informacije vezano za autobusnu liniju Vareš-Zenica, dokle se došlo i gdje je zapelo pa te autobusne linije još uvijek nema, nakon onog sastanka u ministarstvu ZDK kada je linija dogovorena. *(odgovor na ovo pitanje je dat pod pitanjem broj 5, gdje je vijećnik Dario Dodik postavio pitanje ovog karaktera).*
Kao i vezano za nelagodnu deponiju u Nedićima s obzirom da samo kao Općinsko vijeće dobili nalaz nadležne inspekcije za ovaj problem. Ima li tu indicija da bi brezanske vlasti mogle ukloniti tu deponiju u navedenom periodu?

Mirnes Ajanović

1. Inicijativa se odnosi na formiranje ambulate na MZ Budoželje.
(Inicijativa podnesena pisanim putem)

Predsjedavajuća OV stavila je na raspravu Zapisnik sa 1. Vanredne sjednice OV.

Nije bilo primjedbi i predsjedavajuća OV stavila je na izjašnjavanje Zapisnik sa 1. Vanredne sjednice OV i nakon izjašnjavanja vijećnika konstatuje da je **jednoglasno sa 19 glasova „ZA“ usvojen Zapisnik sa 1. Vanredne sjednice OV.**

Predsjedavajuća OV stavila je na raspravu Zapisnik sa 18. sjednice OV.

Nije bilo primjedbi i predsjedavajuća OV stavila je na izjašnjavanje Zapisnik sa 18. sjednice OV i nakon izjašnjavanja vijećnika konstatuje da je **jednoglasno sa 19 glasova „ZA“ usvojen Zapisnik sa 18. sjednice OV.**

Predsjedavajuća OV stavila je na raspravu prijedlog dnevnog reda za **19. sjednicu OV** koji je usaglašen na Kolegiju Općinskog vijeća.

Nije bilo učesnika i predsjedavajuća OV stavila je na izjašnjavanje prijedlog dnevnog reda 19. sjednice OV i nakon izjašnjavanja vijećnika konstatuje da je **jednoglasno sa 16 glasova „ZA“** (odsutni vijećnici Maja Berberović, Nurdin Begović i Igor Hinger) **usvojen sljedeći**

Dnevni red

1. Izvještaj o izvršenju budžeta/proračuna Općine Vareš za period januar/siječanj – jun/lipanj 2022. godine.
Izjestilac: Općinski načelnik.
2. Prijedlog Odluke o uslovima i načinu davanja u zakup dijela poslovne zgrade u vlasništvu Općine Vareš („Centralna radionica“ površine 3.596 m²)
Izjestilac: Ermin Musa
3. Prijedlog Odluke o povjeravanju na upravljanje i raspolaganje vozila za prikupljanje i odvoz otpada Javnom komunalnom preduzeću d.o.o. Vareš.
Izjestilac: Ermin Musa
4. Prijedlog Odluke o usvajanju Programa razvoja zaštite i spašavanja ljudi i materijalnih dobara od prirodnih i drugih nesreća na području Općine Vareš za period 2022-2027. godine.
Izjestilac: Ibrahim Spahić
5. Prijedlog Odluke o izgradnji svjetlosne saobraćajne signalizacije (semafora) u ulici Put mira.
Izjestilac: Ermin Musa
6. Prijedlog Odluke o prodaji nekretnine radi oblikovanja građevinske parcele (građevinsko zemljište površine 213 m²).
Izjestilac: Ermin Musa
7. Prijedlog Rješenja o prenosu prava posjeda i vlasništva u korist Općine Vareš (508 m²) sa vlasništva MZ Pržići
Izjestilac: Ermin Musa
8. Prijedlog Programa finansiranja komunalnih djelatnosti za 2023. godinu.
Izjestilac: Ermin Musa.

9. Prijedlog Strategije razvoja lokalnih cesta i ulica u gradu i naseljima, za period od 2022.-2032. godine.
Izjestilac: Ermin Musa
10. Izvještaj o realizaciji Programa rada Općinskog vijeća Vareš za prvo polugodište 2022. godine.
Izjestilac: Sekretar OV.
11. Informacija o stipendiranju i stipendistima općine Vareš u akademskoj 2021/2022. godini.
Izjestilac: Čedomir Jelić.
12. Informacija o ostvarivanju osnovnih i dopunskih prava iz oblasti boračko-invalidske zaštite na području općine Vareš.
Izjestilac: Čedomir Jelić
13. Tekuća pitanja.

Ad. 1.

*(Izvjestaj o izvršenju budžeta/proračuna Općine Vareš
za period januar/siječanj – juni/lipanj 2022. godine.)*

Komisija za privredu, finansije i budžet na 8. sjednici održanoj 24.10.2022. godine sa 3 glasa „ZA“ i 1 „SUZDRŽANIM“ glasom donijela sljedeće Zaključke:

1. **Komisija prihvata Izvještaj/Izvješće o izvršenju budžeta/proračuna Općine Vareš za period januar/siječanj-juni/lipanj 2022. godine i isti se upućuje Vijeću na razmatranje.**
2. **Komisija traži da Služba za privredu, finansije i trezor za narednu sjednicu Komisije, dostavi odgovor po kojim se internim aktima vrši isplata za raseljena lica (kod 614 233).**

Komisija traži da Služba za privredu, finansije i trezor dostavi odgovor da li se dešava da se prekorači dozvoljeni ugovoreni iznos za javnu nabavku. (od ugovorenih 220.000 KM za javnu nabavku već je u prvih 6 mjeseci iskorišteno 197.242 KM)

Izjestilac nije imao dodatno pojašnjenje za ovu tačku dnevnog reda.

Otvorena je rasprava u kojoj su učestvovali vijećnici: Dario Dodik (*iznio mišljenje u vezi povećanja stavki za tekuće grantove i grantove pojedinaca, smatra da treba aktivnije krenuti u infrastrukturno ulaganje*), Emir Islamović (*sugeriše da se projekti za koje su potpisani ugovori (sanacija mosta, dječijeg igrališta i sl.) do kraja godine završe, ispred Kluba SDA izjavio da će Klub podržati Izvještaj*), Dario Dodik (*replika-uz pojašnjenje izjavio da će glasati protiv Izvještaja*) i Općinski načelnik Zdravko Marošević koji je dao dodatna pojašnjenja na izlaganja vijećnika.

Nije više bilo učesnika u raspravi i predsjedavajuća OV stavila je na izjašnjavanje Izvještaj o izvršenju budžeta/proračuna Općine Vareš za period januar/siječanj – juni/lipanj 2022. godine.

Nakon izjašnjavanja vijećnika predsjedavajuća OV konstatuje da je sa **18 glasova „ZA“ i 1 glasom „PROTIV“ usvojen**

***Izveštaj o izvršenju budžeta/proračuna Općine Vareš
za period januar/siječanj – juni/lipanj 2022. godine.***

Ad. 2.

(Prijedlog Odluke o uslovima i načinu davanja u zakup dijela poslovne zgrade u vlasništvu Općine Vareš. („Centralna radionica“ površine 3.596 m²)

Komisija za statutarna pitanja i propise na 16. sjednici održanoj 26.10.2022. godine jednoglasno je donijela sljedeći Zaključak:

- **Komisija za statutarna pitanja i propise nema primjedbi na Prijedlog Odluke o uslovima i načinu davanja u zakup dijela poslovne zgrade u vlasništvu Općine Vareš („Centralna radionica“ površine 3.596m²) i isti upućuje Vijeću na razmatranje.**

Izvjestilac nije imao dodatno pojašnjenje za ovu tačku dnevnog reda.

Nije bilo rasprave i predsjedavajuća OV stavila je na izjašnjavanje Prijedlog Odluke o uslovima i načinu davanja u zakup dijela poslovne zgrade u vlasništvu Općine Vareš. („Centralna radionica“ površine 3.596 m²).

Nakon izjašnjavanja vijećnika predsjedavajuća OV konstatuje da **je jednoglasno sa 18 glasova „ZA“** (odsutan vijećnik Salih Memić) **usvojena**

Odluka o uslovima i načinu davanja u zakup dijela poslovne zgrade u vlasništvu Općine Vareš. („Centralna radionica“ površine 3.596 m²)

Ad.3.

(Prijedlog Odluke o povjeravanju na upravljanje i raspolaganje vozila za prikupljanje i odvoz otpada Javnom komunalnom preduzeću d.o.o. Vareš.)

Komisija za statutarna pitanja i propise na 16. sjednici održanoj 26.10.2022. godine jednoglasno je donijela sljedeći Zaključak:

- **Komisija nema primjedbi na Prijedlog Odluke o povjeravanju na upravljanje i raspolaganje vozila za prikupljanje i odvoz otpada Javnom komunalnom preduzeću d.o.o. Vareš i isti upućuje Vijeću na razmatranje.**

Izvjestilac nije imao dodatno pojašnjenje za ovu tačku dnevnog reda.

Nije bilo rasprave i predsjedavajuća OV stavila je na izjašnjavanje Prijedlog Odluke o povjeravanju na upravljanje i raspolaganje vozila za prikupljanje i odvoz otpada Javnom komunalnom preduzeću d.o.o. Vareš.

Nakon izjašnjavanja vijećnika predsjedavajuća OV konstatuje da je **jednoglasno sa 18 glasova „ZA“** (odsutan vijećnik Salih Memić) **usvojena**

Odluka o povjeravanju na upravljanje i raspolaganje vozila za prikupljanje i odvoz otpada Javnom komunalnom preduzeću d.o.o. Vareš.

Ad.4.

(Prijedlog Odluke o usvajanju Programa razvoja zaštite i spašavanja ljudi i materijalnih dobara od prirodnih i drugih nesreća na području Općine Vareš za period 2022-2027. godine.)

Komisija za statutarna pitanja i propise na 16. sjednici održanoj 26.10.2022. godine jednoglasno je donijela sljedeći Zaključak:

- **Komisija nema primjedbi na Prijedlog Odluke o usvajanju Programa razvoja zaštite i spašavanja ljudi i materijalnih dobara od prirodnih i drugih nesreća na području Općine Vareš za period 2022-2027. godine i isti upućuje Vijeću na razmatranje.**

Izvjestilac nije imao dodatno pojašnjenje za ovu tačku dnevnog reda.

Nije bilo rasprave po ovoj tački dnevnog reda i predsjedavajuća OV stavila je na izjašnjavanje Prijedlog Odluke o usvajanju Programa razvoja zaštite i spašavanja ljudi i materijalnih dobara od prirodnih i drugih nesreća na području Općine Vareš za period 2022-2027. godine.

Nakon izjašnjavanja vijećnika predsjedavajuća OV konstatuje da je **jednoglasno sa 18 glasova „ZA“** (odsutan vijećnik Salih Memić) **usvojena**

Odluka o usvajanju Programa razvoja zaštite i spašavanja ljudi i materijalnih dobara od prirodnih i drugih nesreća na području Općine Vareš za period 2022-2027. godine.

Ad.5.

(Prijedlog Odluke o izgradnji svjetlosne saobraćajne signalizacije (semafora) u ulici Put mira.)

Komisija za statutarna pitanja i propise na 16. sjednici održanoj 26.10.2022. godine jednoglasno je donijela sljedeći Zaključak:

- **Komisija nema primjedbi na Prijedlog Odluke o izgradnji signalizacije (semafora) u ulici Put mira i isti upućuje Vijeću na razmatranje.**

Izvjestilac nije imao dodatno pojašnjenje za ovu tačku dnevnog reda.

U raspravi su učestvovali: predsjedavajuća OV Mahira Brkić (*uputila pitanje na kojoj se lokaciji planira postavljanje semafora*), vijećnik Asmir Čizmo (uz pojašnjenje traži pogodniju lokaciju za postavljanje semafora) i pomoćnik načelnika Ermin Musa koji je dao dodatno pojašnjenje.

Na osnovu rasprave predsjedavajuća OV predložila je dopunu člana 1. Prijedloga Odluke i to: u članu 1. iza riječi „Stojkovići“ dodaju se riječi „ili ulica Put mira i Čaršija.“, a da se prilikom izrade projektne dokumentacije odredi najpogodnije mjesto za postavljanje semafora.

Predsjedavajuća OV stavila je na izjašnjavanje Prijedlog Odluke o izgradnji signalizacije (semafora) u ulici Put mira sa predloženom dopunom.

Nakon izjašnjavanja vijećnika predsjedavajuća konstatuje da je **jednoglasno sa 17 glasova „ZA“** (odsutni vijećnici Mario Mirčić i Salih Memić) **usvojena**

Odluka o izgradnji svjetlosne signalizacije (semafora) u ulici Put mira.

Ad.6.

(Prijedlog Odluke o prodaji nekretnine radi oblikovanja građevinske parcele (građevinsko zemljište površine 213 m²).

Komisija za statutarna pitanja i propise na 16. sjednici održanoj 26.10.2022. godine jednoglasno je donijela sljedeći Zaključak:

- **Komisija nema primjedbi na Prijedlog Odluke o prodaji nekretnine radi oblikovanja građevinske parcele (građevinsko zemljište površine 213 m²) i isti upućuje Vijeću na razmatranje.**

Izvjestilac nije imao dodatno pojašnjenje za ovu tačku dnevnog reda.

Nije bilo rasprave po ovoj tački dnevnog reda i predsjedavajuća OV stavila je na izjašnjavanje Prijedlog Odluke o prodaji nekretnine radi oblikovanja građevinske parcele (građevinsko zemljište površine 213 m²).

Nakon izjašnjavanja vijećnika predsjedavajuća OV konstatuje da je **jednoglasno sa 18 glasova „ZA“** (odsutan vijećnik Salih Memić) **usvojena**

Odluka o prodaji nekretnine radi oblikovanja građevinske parcele (građevinsko zemljište površine 213 m²).

Ad.7.

(Prijedlog Rješenja o prenosu prava posjeda i vlasništva u korist Općine Vareš (508 m²) sa vlasništva MZ Pržići).

Izvjestilac nije imao dodatno pojašnjenje za ovu tačku dnevnog reda.

Nije bilo rasprave po ovoj tački dnevnog reda i predsjedavajuća OV stavila je na izjašnjavanje Prijedlog Rješenja o prenosu prava posjeda i vlasništva u korist Općine Vareš (508 m²) sa vlasništva MZ Pržići.

Nakon izjašnjavanja vijećnika predsjedavajuća OV konstatuje da **je sa 18 glasova „ZA“** (odsutan vijećnik Salih Memić) **usvojeno**

***Rješenje o prenosu prava posjeda i vlasništva
u korist Općine Vareš (508 m²) sa vlasništva MZ Pržići.***

Ad.8.

(Prijedlog Programa finansiranja komunalnih djelatnosti za 2023. godinu.)

Izvjestilac nije imao dodatno pojašnjenje za ovu tačku dnevnog reda.

Otvorena je rasprava u kojoj su svoje prijedloge, sugestije, primjedbe i mišljenja iznijeli vijećnici: Dario Dodik (*uz pojašnjenje traži da se u Program uvrste sve ulice koje su izostavljene*), Igor Hinger (*uz dato pojašnjenje iznio je mišljenje o izmjenama koje su uvrštene u Program prošle godine, a odnose se na čišćenje cesta do sela bez navođenja kategorija, u praksi se to nije pokazalo dobro, sugeriše da se iznađe mogućnost zapošljavanja jednog radnika na svakodnevnom održavanju gradske higijene*), Maja Berberović (*traži da JKP retroaktivno obavi poslove za koje je plaćeno-čišćenje ulica, održavanje zelenih površina, s obzirom da je Općina izmirila dugove prema JKP*), Amela Brkić (*uz dato pojašnjenje predložila povećanje stavke za održavanje parkova, igrališta, fontane i sl. i povećanje sredstava za čišćenje rijeke Stavnje ako dosadašnja sredstva nisu dovoljna*), Emir Islamović (*predložio da Općina što prije potpiše ugovor za zimsko i ljetno održavanje*), pomoćnik načelnika Ermin Musa (*dao je pojašnjenje i odgovore, izjavio je da će se u Programu izvršiti dopuna u smislu da će se navesti sve ulice (nazivi sa dužinama), uradit će se dopuna u preambuli, mišljenja je da se u budžetu trebaju povećati sredstva namijenjena za gradsku čistoću, putevi će se čistiti po prioritetu gdje su naseljena mjesta i gdje ima linija za prevoz učenika i prema hitnosti*), Maja Berberović, Dario Dodik (*da se sredstva planirana u Programu usklade u Budžetu*), pomoćnik načelnika Ermin Musa (*dao je pojašnjenje da je zakonska obaveza da Program finansiranja komunalnih djelatnosti donosi Vijeće najkasnije do 30. 11. za narednu godinu*), Malik Rizvanović (*predložio da se u tabeli 12. pod stavkom „pranje saobraćajnih površina“ doda još jedna ulica-dio puta u MZ Dabravine*), Igor Hinger i Maja Berberović.

Predsjedavajuća OV pozvala je vijećnike da konkretno, decidno i jasno predlože ispravke, odnosno izmjene u Programu.

Vijećnica Amela Brkić uz dato pojašnjenje predložila je da se na str. 3. stavka „čišćenje korita rijeke Stavnje“ gdje je planiran iznos od 4.550,00 KM poveća na iznos od 10.000,00 KM i na str. 9 tabela br. 7 „održavanje dječijeg igrališta, fontana“ da se planirani iznos od 5.000,00 KM poveća na iznos 7.000,00 KM.

Pomoćnik načelnika Ermin Musa u svom obraćanju izjavio je da prihvata prijedlog vijećnice Amele Brkić. Također se prihvata da će u Programu biti nabrojane sve ulice.

Zaključena je rasprava i predsjedavajuća OV stavila je na izjašnjavanje Prijedlog Programa finansiranja komunalnih djelatnosti za 2023. godinu, sa prihvaćenim izmjenama i dopunama.

Nakon izjašnjavanja vijećnika predsjedavajuća OV konstatuje da je sa **18 glasova „ZA“ i 1 glasom „PROTIV“ usvojen**

Program finansiranja komunalnih djelatnosti za 2023. godinu.

Ad.9.

(Prijedlog Strategije razvoja lokalnih cesta i ulica u gradu i naseljima, za period od 2022.-2032. godine.)

Izjavitelj nije imao dodatno pojašnjenje za ovu tačku dnevnog reda.

Otvorena je rasprava u kojoj su svoje primjedbe, prijedloge, pitanja i mišljenja iznijeli vijećnici: Igor Hinger (*postavio pitanje zašto nisu navedene neke ceste koje se trebaju u dogledno vrijeme asfaltirati -dionica puta Ponikve-Javornik, dionica zaseoka prema Vijaci*), Dario Dodik (*uz dato pojašnjenje skrenuo pažnju na planirana sredstva za radove na određenim dionicama i trenutno poskupljenje materijala*), Šaban Ibrišimović (*uz dato pojašnjenje predložio je da dionica puta prema Bobovcu bude prioritet u sanaciji i održavanju kako je i predložio u amandmanu po javnoj raspravi o navedenoj Strategiji*), Maja Berberović (*skrenula je pažnju na ulice u gradskom području koje su razvrstane po prioritetima od 1-4, s obzirom da je Strategija za period od 10 godina, predložila je da sve ulice trebaju da spadaju u 1. i 2. prioritet, o istom je dala pojašnjenje*), pomoćnik načelnika Ermin Musa (*podsetio je prisutne da je Odlukom o kategorizaciji puteva propisano koji su to lokalni putevi i da je to u nadležnosti kantona, Strategija je okvirni pravac i to daje mogućnost da se mogu raditi i one dionice koje nisu navedene u istoj, o istom je dao pojašnjenje, predložio je da Vijeće usvoji Strategiju u predloženom obliku*), Mahira Brkić (*uz obrazloženje izjavila je da bi Vijeće trebalo pokrenuti Inicijativu o kategorizaciji puteva*), Nikola Šimić (*iznio je svoje mišljenje u vezi realizacije Strategije, odnosno izgradnji ili sanaciji cesta u proteklih 10 godina, skrenuo je pažnju na ulicu Nikovac i traži da se ista uvrsti u asfaltiranje*), Amela Brkić (*postavila pitanje zašto lokalni put Luke-Neprivaj nije uvršten u Strategiju*) i Dario Dodik (*skrenuo je pažnju da je potrebno uraditi izmjene ili dopune (da se navede stvarno stanje ulica i da se navedu sve ulice u slučaju da nisu) Odluke o nazivima ulica u naseljenim mjestima gradskog područja općine Vareš koja je donesena 2002. godine*).

Zaključena je rasprava i predsjedavajuća OV predložila je da Vijeće usvoji Strategiju sa svim sugestijama koje su iznesene na današnjoj sjednici, a gdje se ceste, ulice, gradske ulice, naselja nalaze u Odluci o kategorizaciji, znači da se sve te ulice, lokalne ceste nađu ujedno i u ovoj Strategiji, sa ispravkama o kojim je vijećnik Dodik govorio (ako je nešto oštećeno da se tako i navede, da se navede stvarno stanje iz 2022. godine. Predložila je da vijećnik Dario Dodik pripremi Inicijativu o kojoj se govorilo za 20. sjednicu OV, a da Služba za prostorno uređenje na sljedećoj sjednici OV, Vijeće pismenim putem obavijesti šta je uradila po pitanju izmjena koje su tražene u raspravi u smislu Strategije.

Predsjedavajuća OV stavila je na izjašnjavanje sljedeći

Zaključak:

- **Usvaja se Strategija razvoja lokalnih cesta i ulica u gradu i naseljima za period od 2022.-2032. godine sa svim sugestijama koje su iznesene na 19. sjednici OV koja je održana 27.10. 2022. godine (ceste, ulice, gradske ulice, naselja koja se nalaze u Odluci o kategorizaciji, da se iste ulice uvrste u Strategiju razvoja lokalnih cesta i ulica u gradu i naseljima za period 2022.-2032. godine sa ispravkama odnosno sa trenutnim stanjem.**
- **Zadužuje se Služba za prostorno uređenje da pismenim putem upozna Vijeće na sljedećoj sjednici OV o izmjenama koje su uvrštene u Strategiju razvoja lokalnih cesta i ulica u gradu i naseljima za period 2022.-2032. godine.**

Nakon izjašnjavanja vijećnika predsjedavajuća OV konstatuje da je **jednoglasno sa 19 glasova „ZA“ usvojen predloženi Zaključak i**

***Strategija razvoja lokalnih cesta i ulica u gradu
i naseljima, za period od 2022.-2032. godine.***

Ad.10.

*(Izveštaj o realizaciji Programa rada Općinskog vijeća
Vareš za prvo polugodište 2022. godine.)*

Sekretar OV dao je dodatno pojašnjenje za ovu tačku dnevnog reda.

Predsjedavajuća OV je konstatovala da je Vijeće kao cjelina završilo sve ono što su nadležne službe pripremile i dostavile, ali opet na žalost ispunjenje Programa rada Općinskog vijeća Vareš za prvo polugodište 2022. godine je 81,3%. Po Programu rada Općinskog vijeća Vareš za prvo polugodište nije realizovano 8 normativno-pravnih akata. Kod određenih akata navedeno je da je nepoznat razlog. U vezi toga predsjedavajuća OV je uz dato pojašnjenje izjavila je da će na sljedećoj sjednici predložiti jedan Zaključak, gdje će tražiti informaciju sa decidno navedenim podacima i razlozima zašto određene tematske ili normativne cjeline nisu usvojene ili razmatrane (naziv Općinske službe, imenom i prezimenom odgovorna osoba nam nije dostavila materijal na razmatranje, bit će decidno navedeno. U Zaključku će stajati da to mora biti objavljeno i na službenoj stranici Općine Vareš kao jedinstvenog Općinskog organa, da se jasno i decidno zna ko je i gdje je zakazao.)

Otvorena je rasprava u kojoj su svoje primjedbe, prijedloge, pitanja i mišljenja iznijeli vijećnici: Dario Dodik (*predložio je da se od sada, ukoliko nešto po planu i programu nije urađeno i dostavljeno Vijeću, traži obrazloženje od Općinskih službi da nas informišu zašto to nije realizovano*) i Maja Berberović (*traži da Općinske službe poštuju rok za dostavu materijala (do 15-og u mjesecu) o kome treba da Vijeće raspravlja a koji je naveden u Programu rada OV.*)

Zatvorena je rasprava i predsjedavajuća OV stavila je na izjašnjavanje Izveštaj o realizaciji programa rada Općinskog vijeća Vareš za prvo polugodište 2022. godine.

Nakon izjašnjavanja vijećnika predsjedavajuća OV konstatuje da je **jednoglasno sa 19 glasova „ZA“ usvojen**

***Izveštaj o realizaciji Programa rada Općinskog vijeća
Vareš za prvo polugodište 2022. godine.***

Predsjedavajuća OV predložila je sljedeći Zaključak: Da Stručna služba OV pripremi Vijeću akt koji će u suštini biti 70% ovog Izveštaja ali u smislu samo nerealizovanih tačaka, da po svakoj tački se navede nositelj izrade odnosno služba, rukovodilac koji vodi službu, referent koji je zadužen za izradu, razlozi zbog kojih materijal nije urađen i nisu dostavili obrazloženje do roka zašto nije urađen. Isti akt da se objavi na službenoj web stranici Općine Vareš.

Sekretar OV javio se za riječ i zamolio predsjedavajuću da povuče prijedlog zaključka s obzirom da se radi o polugodišnjem izvještaju, a godišnji Izvještaj za 2022. godinu će se uraditi detaljno i temeljito gdje će ti podaci biti navedeni, kao i nerealizovani zaključci i vijećnička pitanja.

Za riječ se javio vijećnik Emir Islamović koji je uz dato pojašnjenje uputio pitanje sekretaru OV da li Vijeće može tražiti podatke sa niže referente.

Sekretar OV izjavio je da se može zahtijevati od Općinskog načelnika da on kao izvršni organ insistira da se tematske i normativne cjeline koje su utvrđene Programom rada OV realizuju do kraja ove godine.

Vijećnik Dario Dodik u svom obraćanju predložio je da Vijeće donese Zaključak kojim će se obavezati Općinski načelnik da od Službi koje su bile nadležne za određene materijale a koji nisu dostavljeni Vijeću, dostave obrazloženje Načelniku i Vijeću zbog čega nešto nije urađeno. Također je uz dato pojašnjenje predložio da ubuduće u Izvještaju navede se informacija o svim nerealizovanim zaključcima, inicijativama i sl. iz prošlog perioda.

Predsjedavajuća OV je na osnovu iznesenih prijedloga, predložila i stavila na izjašnjavanje sljedeće

Zaključke:

- 1. Da sljedeći Izvještaji o realizaciji Programa rada OV sadrže podatke o realizovanim ili nerealizovanim Zaključcima i Inicijativama koji su iz prethodne godine.**

Nakon izjašnjavanja vijećnika predsjedavajuća OV konstatuje da **je jednoglasno sa 18 glasova „ZA“ (odsutan vijećnik Mario Mirčić) usvojen Zaključak.**

- 2. Vijeće traži od Općinskog načelnika informaciju koju će dobiti od nadležnih službi, da se o svakoj nerealizovanoj tački iz Programa rada OV za prvo polugodište 2022. godine, dostavi obrazloženje zašto nije realizovano i koji je krajnji rok realizacije. Informaciju dostaviti do naredne sjednice OV .**

Nakon izjašnjavanja vijećnika predsjedavajuća OV konstatuje da **je jednoglasno sa 18 glasova „ZA“ (odsutan vijećnik Mario Mirčić) usvojen Zaključak.**

Ad.11.

*(Informacija o stipendiranju i stipendistima
općine Vareš u akademskoj 2021/2022. godini.)*

Izjavitelj nije imao dodatno pojašnjenje za ovu tačku dnevnog reda.

Nije bilo rasprave po ovoj tački dnevnog reda i predsjedavajuća konstatuje uz Zaključak da je **Vijeće primilo k znanju**

***Informaciju o stipendiranju i stipendistima
općine Vareš u akademskoj 2021/2022. godini***

Ad.12.

*(Informaciju o ostvarivanju osnovnih i dopunskih prava
iz oblasti boračko-invalidske zaštite na području općine Vareš.)*

Izjavitelj nije imao dodatno pojašnjenje za ovu tačku dnevnog reda.

Nije bilo rasprave po ovoj tački dnevnog reda i predsjedavajuća konstatuje uz Zaključak da je **Vijeće primilo k znanju**

***Informaciju o ostvarivanju osnovnih i dopunskih prava
iz oblasti boračko-invalidske zaštite na području općine Vareš.***

**Ad.13.
(Tekuća pitanja.)**

Predsjedavajuća OV upoznala je prisutne sa pristiglom poštom i to.

1. Dopis o pokretanju upravnog spora po tužbi tužitelja BBM VAREŠ d.o.o. VAREŠ broj: 04 0 U 013729 22 U 2 od 14.09. 2022. godine dostavljen od Kantonalnog suda u Zenici.

Predsjedavajuća OV Mahira Brkić je informisala Vijeće, gdje je konstatovala da je žalba odbijena i da je presuda pravosnažna postala.

2. Odgovor na Dopis broj: 18-22-00038/22-07-09-P-07-09-002-P od 13.09. 2022. godine vezano za Obavijest i Molbu OV broj 01-177/22 od 28.07. 2022. godine (a na osnovu Zahtjeva Plavšić Latinke) gdje se traži da se pristupi u kontroli bespravne sječe i uništenja puteva u odjelu 9 tzv. Camilov potok.

Predsjedavajuća OV Mahira Brkić je informisala Vijeće o provedenoj proceduri po navedenom Dopisu.

3. Odgovor Kantonalne uprave za inspekcijske poslove sektor za Inspekciji nadzor zaštite okoliša broj: 18-19-11890/22-08-01-002 od 02.09. 2022. godine, na Zaključak OV Vareš broj: 01-178/22 od 28.07 2022. godine a u vezi sa donošenja rješenja u vezi odlaganja komunalnog otpada na ilegalnoj deponiji na području općine Breza uz regionalnu cestu Breza-Vareš, a koje je izvršeno od strane JP Komunalno d.o.o. Breza.

Predsjedavajuća OV Vareš Mahira Brkić je radi informisanja javnosti pročitala odgovor i konstatovala da je Kantonalna uprava za inspekcijske poslove učinila sve što je mogla, ali da nije nađeno konačno rješenje, i da od Tužilaštva Zeničko-dobojskog kantona nije došao odgovor vezan za ovu tematiku.

4. Zahtjev za novčanu pomoć dostavljen od strane Ivice Kokorovića u svrhu troškova operativnog postupka hitne transplantacije rožnice oka za kćerku Jelenu Kokorović od 14.10. 2022. godine.

Predsjedavajuća OV Mahira Brkić je predložila i stavila na izjašnjavanje slijedeći

Zaključak

- **Kokorović Ivici, iz Vareš Majdana, općina Vareš, dodjeljuje se novčana pomoć u iznosu od 5.000,00 KM za troškove liječenja kćerke Kokorović Jelene.**

Nakon izjašnjavanja vijećnika predsjedavajuća OV konstatuje da je usvojen **jednoglasno sa 19 glasova „ZA“ usvojen predloženi Zaključak.**

5. Vijećnica Maja Berberović predložila je prijedlog

Zaključka:

- **Općinsko vijeće Vareš traži od Kantonalne direkcije za ceste da hitno pristupi sanaciji mosta na regionalnoj cesti R 444 u naseljenom mjestu Pajtov Han prije skretanja za MZ Striježevo, općina Vareš. Sanaciju je potrebno izvršiti prije zimskog perioda, jer je narušena bezbjednost saobraćaja za sve učesnike.**
- **Ovaj Zaključak stupa na snagu danom donošenja.**

Predsjedavajuća OV stavila je na izjašnjavanje predloženi Zaključak i nakon izjašnjavanja vijećnika konstatuje da je **jednoglasno sa 19 glasova „ZA“ usvojen predloženi Zaključak.**

Sastavni dio ovog Zapisnika je audio zapis sjednice.

Sjednica je završena u 18.15 sati.

S E K R E T A R

Leon Pavlović

ZAPISNIČAR

Azra Pijadžer

***PREDSJEDAVAJUĆA
OPĆINSKOG VIJEĆA***

Mahira Brkić